

雙
溪
集
附遺言
三





雙溪集

附遺言

蘇籀撰

雙溪集卷第十一

疏

天申聖節疏

千齡聖瑞。運叶亨嘉。四海樂推。道隆康濟。虔假三乘之妙。鴻延萬壽之祺。凡庶同詞。普天善禱。恭惟皇帝陛下。乾健不息。離明正中。仁增益高。施博彌溥。受天之祿。如川方興。雪復神州。綏靖華夏。永御無疆之歷。固安不拔之基。

徽宗皇帝寧德皇后上仙薦疏

伏以日月告凶。天地震裂。攀龍罔逮。御駿已遙。凡在照臨。豈勝摧慕。伏惟太上道君皇帝。憂勞二紀。化育萬方。逮北狩之不還。劇函生之延企。伏惟寧德皇后。坤元柔順。屯難遭迴。法宮未返於椒蘭。贈榼遽陳於葦狄。爰假大雄之妙力。以資仙馭之神游。伏願威靈在天。並生兜率。福祚垂世。寧壹寰瀛。

功德疏

石紐發祥。天命丕顯。猗蘭鍾慶。邦祚有開。凡亨育之範圍。贊延鴻之睿算。恭緣願力。祇叩佛乘。仰十力之覺茲。從萬方之懇願。恭惟皇帝陛下。堯仁舜孝。禹儉湯寬。崧嶽海隅。咸樂生而遂性。金玉王度。益固蒂而深根。等久大於乾坤。齊光靈於箕翼。

詮老再住智者疏

須彌最上之層。不妨進步。渤解無邊之際。復有返流。亡固必以適時。斷去來而解脫。設惑迷於作相。祇見笑于大方。詮公禪師祖派的孫。僧中先覺。藻飾焉用。圭璧自清。首開甘露之門。心在水晶之域。勇擊蒙障。妙闡宗乘。無著孤蹤。從飛錫杖。紳笏苦空之友。雲水參寥之徒。祈常依于慧燈。願再鳴于法鼓。既四衆悉推輓。爲一大事因緣。合浦還珠。世人人之有分。驚山浹雨。物種種以皆需。仰惟幡然。允從衆志。

天申節疏

祥濬發而社鳴。錫符睿聖。德休明而鼎重。祚世延鴻。西竺演文。南山增固。伏願皇帝陛下。因天所授。如日而躋。降年倍於助華。八荒壽域。闢國競于唐漢。九有渾同。

請天寧華老疏

妙解脫梵音。雷霆警於昏聩。自受用三昧。日月揭于冥迷。溥分光以襲明。更敲空而作響。所謂無礙正法眼藏。是名慈悲振鼻孔機。華公禪師學苦行尊。探蹟索隱。僧中龍象。人裏鳳麟。背廬霍以向金華。闡毗曇而遵般若。躋堂入奧。植拂拈槌。籍籍祖風。知源流之有自。森森法器。振綱領以當仁。帆亦渡海而依風。雲不擇地而致雨。光孝佛刹。先朝道場。不憚象駕飛空之勤。佇觀猊牀無畏之吼。雙溪在目。漱流演千偈之談。東臬有秋。香積備八珍之供。囑佛慈護。贊聖無疆。

淨土塔求化僧葺疏

伏以三百尺之磴梯。攀援天界。九一層之欄柱。標表梵王。想營造泗濱。曰觀國師。顧興崇婺郡。云釋居政。證果無上。象教最尊。淨土招提。浙江名刹。往者甞運增埤。物外雄夸於空碧。材掄疊拱。翬飛翼跋于仙飈。曩聞鈴鐸玕璫。斯時鸞鶴栖止。日照重輪之五色。月出白毫之瑞光。回祿而檳榔灰埃。精廬之龍象索漠。求化冠纓士女。宗奉般若菩提。累一木而福高岑樓。施一錢而惠沾沙界。不厭抽斂脫劍。何妨積鏹堆金。遂成輪奐之卓然。感召休符於雜杏。凝機却厲。必屢豐年。祝聖延期。永躋壽域。

記

常山縣主簿題名記

衢所隸五縣。西曰常山。溪谷迴阻。曩時號爲巖險僻左。比年聖上駐蹕臨安。冠蓋旁午。甲兵往來。乃江湖閩廣水陸之衝。至爲孔道。津驛廩庫之吏。與其輿臺。迓勞無虛日。事倍蓰於旁近他邑。然縣令之次。有尉無簿。夫百里賦政。非有佐貳。何以辦治。譬如羽翮修而鴻鵠舉。宮商應而琴瑟調。苟補左而缺右。有唱而弗和。殆不濟也。簿之於令。聯事而不逼。分勞而不專。上下咸以置之爲便。紹興四年二月庚申。資政殿大學士宣奉大夫。陽夏郡謝公任伯知軍州事。言於朝。吾友韓君昂子平實。被選辟越。三月某日。奉命視事。因舊廢館。繕公廨焉。君以謝公見用之意。不陋枳棘。不懈箴儆。所治者雖小。務知者大。出入朱墨。鉤校精覈。一毫必利於公上。一豆不落於人手。於文無害。其長蒙成。衆謂稱其職。至於沿牒而稽經決獄。絃歌而

乘間攝縣。嘖呻纖悉。情僞洞曉。蓋有補當今。見思異日者甚多焉。故當路數數薦之。逮終更伊邇。書來告曰。凡官舍皆刻石題名。創制茲職。肇自我先子爲記之。以貽後政之君子。余竊以古人謹始必書。夫興廢當理。則見稱圖治。宜民則可紀。可紀雖黃綬。傳不朽。不然雖千駟無足道。矧賢牧伯之首建明。而吾友効官如此。不患湮淪也。姑妄書之。紹興六年六月十日。眉山蘇籀記。

題跋

跋摹連昌宮辭

伯祖東坡先生嘗爲易傳。以真書發揚伏羲西伯之旨。嶺海草書。老筆精勁。自云不愧二王。遭亂後。家藏書帖。散失略盡。尙明所摹連昌宮辭。頓還伯英舊觀。而過於賀拔恕數倍矣。書雖哲人細事。心慕手追。如此其大者。鮮不深造。故余三歎而屢嘉也。紹興改元十月日。蘇籀題。

跋海棠夢大字

猗歟偉歟。如見真本。庶幾遺範。賸者果能亂真耶。但瞠然慕歎耳。嗟夫。世人不得於心。勿求於筆。其或筆驕心不競也。勉哉。到聖處可謂善學矣。紹興二禩季春下旬。蘇籀題。

跋東坡拔豕帖

先生早年在岐下。寫楚詞一章云。似鍾繇行體。筆能趁意。是時書畫已絕出世俗。自壯逮老。周游四方。古

人奇蹟。無不臨遍。嶠南書帖。特爲超妙。嘗戲語云。可比二王。所謂七十而從心。不踰矩者也。嗟夫。雖天資殊異。亦須積習。始蹈大成。况常常者。其可不勉耶。

跋惠州芳華洲刻石

延平范公智聞使君。恬於榮進。自詭治民。不鄙夷嶠南之俗。鷺城左江右湖。想其城如隄防。民如雁鷺。屋如舟舫。樹如菰蒲。故有古勝嘉名。造物特發其祕。以遺公。觀公與諸賢所記備矣。或曰。荒裔茅篠。與蛟人。蜺戶錯雜。氛侵毒霧。發作無節。非華風矣。惟公能以循史惻怛之實。盡心撫育。令聞睦然以光。蒞厥茨莠。化爲廩倉。物無疵癘。而戶口增。山有嘉卉。而桑果茂。尚儒而士甚文。遏寇而民益豐。芳流華顯。名不虛應。公夙有詩識。與今石刻符合。豈偶然也哉。期公奉三年計最。歸報九重。用其實學。藻飾寰海。使品彙無凋枯焉。嗚呼。出處有命。皆非人力。世人妄生欣慍。誤矣。覽芳華洲之事可見也。

題崧嶺圖 錢

服道篤習水墨。幻雲霧。走山海。筆力尤壯。細察其層疊高下。施設算數。繁悉抄忽。出意無窮。體乎天造。厭於人情。可謂精能老而不勌者也。尺素片紙。極目洒落。此圖僕故山也。觀二室間林壑寥落。使人增感懷耳。

跋任氏東坡詩及所書黃門記

嗚呼。二祖道德之範。見於筆墨。傳示來世。不容擬議。觀其述二大夫樂賢之意。炳然著矣。辨書眞贋。僕粗

能焉。古人謂辭之不可已。故黽勉而題。是歲九月丙辰。

跋般若心經後

佛告舍利佛。般若第一義諦。無心而成正覺。初祖國師。頌釋益曉然。卽羣迷爲聖智。照大闇爲光明。衆生勤念本源自性。由此致悟。潁川元輔。意珠融通。齋心所書。虔奉般若。志願篤矣。以梵夾示余。欲彼此同證善果。不容無言。紹興丙寅歲首夏中休日。眉山蘇籀題。

書三學士長短句新集後

予晚生。希仰前修。彙汲與能。耳目屢接典刑。故老喜幸。如獲麟鳳。壓於昏懵。不知而作者。論文捫卷。每每興歎。顧念九原莫作。述者有跡可傳。不忍置也。曩日正始羣賢在朝。黃、秦、晁、三公騫翔臺閣。追想其奏篇大廷。垂紳文陛。據梧揮犀。石渠東觀。質據辨析。泯然邈矣。所餘著書。名章大論。煒煌照世。其樽俎折衝。款昵名勝。高酬妍倡。以使酒寓意。融金石。感鬼神。咸韶雖隱。陽春白雪。猶將髣髴焉。其風流雅尚之最。吾人所欲珍輯。實天下奇韻嘉聞也。嗟夫。東阿豆萁之敏。子敬蠶種之墨。淵明閒情之賦。三公度曲。與此何遠。嘗竊評之。黃太史纖穠精穩。體趣天出。簡切流美。能中之能。投棄錡斧。有佩玉之雍容。秦校理落盡畦畛。天心月脇。逸格超絕。妙中之妙。議者謂前無倫而後無繼。晁南宮平處言近文緩。高處新規勝致。朱絃三歎。斐麗音旨。自成一種姿致。概考其才識。皆內重而外物輕。淳至曠達。學無所遺。水鏡萬象。謝遣勢利。淵祕陳俚。發爲新雅。有謂寓言。罕能名之。三公同相照並駕而馳。聲稱彰灼於天下。斯文經緯乎一世。洪濤

萎敝剝裂無稽之徒熄矣。吾儕齷齪生諷詠。喁喁劇目娛心。痼文字之癖。昔謝安石中年傷於悲歡與親友別。作數曰惡。王右軍曰。正賴絲竹陶寫耳。嗟夫。吉日良宵。賓主酣飫。笙簧嘈雜。使曠世纖阿之倫。求語意之相類。窮音調之抑揚。上激青雲。蕩泄吾輩胸懷。所謂陶寫也。揚揮耳熱。烏烏梁鴻五噫狂歌。亦茫渺耳。烏能逮此哉。或曰。耳非夔牙。安知幻妙之音。答曰。三公之詞。非專玩而獨鑒者。實四海九州有識之士共焉。故予言而不僭越耳。

跋伯時二馬圖

先祖黃門喜顧陸王韓遺跡。龍眠集三馬見貽。效之者三人。其風儀雄傑。皆可任雙鉞。三槐所馭。殆天廐之龍也。兵火後。粉繪羽化。惟絲字廣唱在。櫝。今觀此髣髴間。感舊屢慨而已。紹興辛未秋孟蘇籀跋。

書輞川圖後

余撝務倥傯。汨俗浮囂。煩促海涯。詎度甄遣。涉筆占位。不謀食息。願釋此而清其思。卯酉進止。寒暑罔避。搖手而吾僚發議。動足而簡書鑄詰。悔吝雖遠。荒嬉何裨。願置此而新其說。有憐而示之以唐王右丞輞莊矮紙圖。披閱屬爾。洒然慕之。按摩詰開元詞宗。張曲江之客。孝友禪悅。書畫絕世。仕而屢歸。其區處門閭。標薊山藪。新規奇概。淵兮卓哉。曠達騷人之思也。其疏舉二十許處。城坳岡坂。葺宇上遊。編菅栽杏。木欄聯柵。茶萸泚瀝。槐柏宮蔭。篠蕩嶺峯。北南湖垞。霏縷煙霞。麋鹿遠跡。人之虞。沿涉信舲。鱸之適。亭臨清泚。柳翻碧波。鬱瀨白石。萬峯金屑。少飲千歲。檀欒爲里。吟歎琴簫。辛夷爲車。桂旂自舉。有用敝割之林。蕃

衍遠條之囿。山居之殊勝。詩眼之識拔如此。予壯歲游藍田。不暇叟覽弔古。良可恨也。蓋城市煖熱。泉石寒涼。往往負炎捨冷。誠知簪笏圭組。不在崧少濠濮。高蓋駟馬。豈若柴車烟艇歟。於乎。余老矣。辯論著造。不少貶而懈。顧何益焉。游止溪山。希眞秦伽斜川。愚谷誠不易可圖也。玩味默存。其間無湫隘塵囂之陋。又無顯嚴高明之瞰。林端水次。莽蒼綿纂。傾岑阻徑。巖豁谷迴。嵐光素雲。自相蒨絢。鷓鴣之賦。菟裘之營。眞趣蘊鍾乎此矣。主人旣以斯畫見貽。置之坐右。朝夕寓目。抑流競養。恬素爲幸。豈細也耶。金穴雕堂之家。玉塵象牀之靡。無施於邱壑矣。紹興辛未孟秋。眉山蘇籀題。

雙溪集卷第十二

啓

代謝呂丞相啓

右某蒙恩受前件差遣。已於某月某日赴上訖。分安僻壤。自便養痾。祇奉恩光。仰煩造物。攬轡沃若。握節慨然。撫民夷風俗之殊。幹山澤財幣之夥。詳味獎予。恐懼叨塵。伏念某少不逮人。老未更事。初無進擢之望。終冀循良之稱。華省振纓。窮途失子。哀悴所迫。衰疾相仍。懇悃一陳。光榮曲被。此蓋伏遇某官。帝所奇寶。王佐異才。社稷元功。掃閭閻之氛祲。邦家係望。補衰職之工能。國是定而紀綱明。兵勢強而姦邪伏。書鼎彝而顯赫。大陶冶以誕鎔。致茲一介之微。亦獲寸長之效。量才受任。藏疾包荒。某敢不收晚暮之桑榆。增太山於塵露。庶幾一簣以補萬一。過此以往。未知所措。

賀張樞密啓

伏審誕颺宸綽。全付樞衡。復辟云初。論功第一。黔黎大慶。將相調和。獲此具瞻。榮逾倫等。竊以北巡未復。謳歌允歸。南渡疾趨。環衛寡弱。值汲黯之在外。顧公孫如發蒙。變生雙闕之前。援乏它師之助。介甲而呼者。爲吠堯之犬。伐鼓而奮者。揮誅錯之戈。孟賁駭于狂童。神龍制于羣蟻。天地尙顧於邦國。朝廷豈乏于仁賢。皆力薄而勢孤。雖心非而口諾。毛先生以三寸之舌。使趙重于九鼎。周太尉以一呼之祖。安劉氏于

太山古常有之。今則復見。伏惟知院樞密。剛大塞乎天地。忠義一於死生。有旦莫千里之才。有吞納百川之量。步武青雲之上。身名北斗之南。捧檄者百列城。聲飛仁者之勇。同心者三大帥。汗流烈士之顏。君王正位於法官。將士悉還于天仗。見股肱爪牙之助。察脂章首鼠之徒。消惡運而遏亂原。抑姦鋒而奮誠節。解腹心之疾。而罔施箴砭。除城社之鼠。而不假薰燔。天下隳之。軍中肅若。深悼艱難之國步。共思英毅之王臣。顧得失存亡之際。非蓄縮鄙凡能辦。以閣下妙齡之人傑。立朝端允代于天工。必進仕于元台。益更張于治具。中興可覲。大業彌隆。相袞命圭。分固當于得免。兵機國事。目不見於全牛。念祖宗之法度可循。講賢哲之建明未泯。何止江南之王謝。定配中原之管蕭。籀玷桑梓之坤維。仰節旄之公府。方且揚眉而吐氣。不勝鑒目而愜心。歡欣交通。歎詠不足。無任爲天下喜忭之至。

賀謝參政啓

伏審入覲嚴宸。延登近弼。虛襟前席。咨大計而條陳。運規從繩。獲真賢而柄用。巖石增峻。飄風自南。立政平章。同心參貳。竊以左右洪造。執持大權。弛今日之憂虞。講當世之備禦。可爲痛哭者非一。如解倒懸之未蘇。天子思治勵精。志勤宵旰。元臣遠猶辰告。力振綱維。武夫虛驕。殆矣偏見。文吏叢脞。疚哉淺聞。廟堂須不世之才。蒼龜戒往事之失。實符人望。宜亮天工。恭惟參政相公。斷金剗裁。絕塵超邁。識邦國遠大之體。得軍旅信伏之心。論思代言。窺伐苗命說之作。解紛排難。卑射聊喻蜀之辭。惟其正色而立朝。固已折衝而卻敵。仁厚惻怛。副黔黎饑渴之時。賞擢精華。致豪傑興起之助。太平之責允塞。勳庸之盛當然。籀入

道不優。登門爲愧。鱣堂之瑞久矣。伏膺牛角之歌。舊蒙採聽。崎嶇直轡。齷齪斷編。無勞可書。有願自效。風俗四維之克舉。芻蕘片說之必行。竊聽倚毗。佇觀施設。王度金玉。共式昭於德音。人材茹茅。益廣開於賢路。仰頌之喜。敷述難工。

賀富中丞啓

伏審東在宸衷。擢領風憲。任隆獻替。用乂搶攘。當大有爲。蓋非常選。多士攸慶。前修不亡。竊以道不虛行。人惟舉類。念昔烈祖之輔。有如鄭公之賢。門緒蕭然。聞望卓爾。廟食赫弈。鼎彝著明。後昆實似其淵源。世俗豈知其髣髴。取故家之成效。在高位必仁人。溫故益新。象賢崇德。典刑有自。箴訓可追。今海岱失于太平。而黔黎喪其常產。約已陳錫。將以收敵愾之心。公聽使能。將以建勃興之業。此意甚切。厥功惟諧。從容訪道之求。類非俗吏之事。必明哲同于山甫。而剛大比于孟軻。其智辯足以平厲階。其仁強足以遵美志。汎應曲當。無頗至公。伏惟中丞妙講規模。深識壺奧。蹇諤匪躬之節。高奇足用之文。論思甚確。而朝無闕遺。執法允明。而士知趨向。聲郵傳於天下。謨幅輳於上前。定傾不平。制勝未戰。求懿德而肆時夏。總羣策而殄妖氛。諛鬼姦魂。巨蠹曩煩於白簡。散材泛駕。小疵稍洗於丹書。知無不言。允副殊眷。位鄰揆路。遷補擬漢之大夫。進參調元。圖任方今之近例。籊粗爲君子所與。竦聞長者之風。讀先正之書。愚不希其萬一。拜高軒之日。理有契於三言。瞭然超軼之蹤。率爾狂狷之作。慶咏之切。敷染奚殫。

賀富知院啓

伏審丕奉寵休。擢司宥密。聲實無忝。瞻屬益深。凡在蒞休。與有榮耀。竊以有世臣者。所謂故國。建明德者。其後達人。豈特爲階闢奇異之觀。實能任邦家輔相之美。以才業之絕異。正名位之穹窿。無替茂勳。復仍舊貫。副朝廷之企佇。厭華夏之傾瞻。惟茲右武之要權。思得佐時之機略。雖俎豆墳典之事。吾儒守文。而鞶鼓金革之間。諸將易得。措世大安。則有道。使敵遠遁。則貴謀。頃刻微差。安危所係。呼吸生變。裁處尤難。折衝於帷幄之間。度兵于枕席之上。六奇五間之策。可應無窮。九流七略之術。何所不用。是由文墨之士。自許驅馳之勞。側聞登庸。實允僉議。伏惟樞密端明。性與道合。意叶才周。閉戶揣摩。已儀式文王之典。前席獻納。實啓沃高宗之心。有長國家之令名。以安社稷而爲悅。約身厲操。比盧懷真之清。因事建言。若蕭望之之正。屢酌獸樽之美。痛繩舊滂。最詳馬棧之施。獨予善類。務農蓄聚。訓兵俟時。以代謀爲奇功。以自守爲進取。馴致遼夏之修好。庶幾魏晉之復歸。度越前芳。非但無愧。籀末品下秩。綿力散材。不因筆牘之儀文。莫敍松蘿之附倚。意向殊切。宜寫難周。

謝顏門下相公啓

伏以樂附德門。實勤頌咏。過形薦牘。曲被矜憐。言重鼎鐘。光生腐朽。飾說嘗干於百里。載名敢瀆於三公。自緣顧念之私。乃致恩知之誤。竊以自別于常人者。必有高韻。辱知于大賢者。盡抱殊能。雖求之乘田委吏之間。而察其輔世安民之具。士難稱愜。才鮮克堪。蓋古今致理之權。公卿報國之志。獎擢之途。忌隘汲引之門。在寬拔十何辭。得五猶半。將以備委任之大。豈徒掠好善之名。方今智勇俱勞。寇攘未弭。宣勛華

之澤而明俊德。分禹稷之憂。而建勲勞。裁成執掌之時。殆由舉措之當。凡有爲而有守。皆與明揚。誠無黨而無偏。豈容魯鈍。此蓋伏遇官使門下相公丈丈。自得者極至。所履者醇深。家傳亞聖之風。世濟哲謀之畫。允協一德。恭斷萬機。居常緣督以爲經。不憚毀家而成國。變理勞而事夥。彌縫巧而功深。逮燕處於琳官。間攝生于庖氏。直諫無隱。會聞汲黯之召還。未俗未敦。宜使楊公之亟用。恢闡風化。保養遺黎。捨我其誰。考慎其相。留意人物。振起綱維。天下將被其休功。國勢殆從而安固。籀酸寒下秩。流落寒蹤。希昔仁賢。讀古墳籍。羣喧卑之俗狀。困褻博之儒紳。旣蒙品藻之優。足改朋僚之觀。益祈博約。無辱提攜。不聞衰窮。魯殆倫於骨肉。在夫臭味。願終効於毫分。過此以還。未知所措。

謝閩帥啓

右籀。被命天闕。效官海邦。未聞畫諾之誰歟。忽覩除書之騰播。繼承開府。競欲登門。睇驢仰高。已云積歲。芘雲附德。實獲素心。道路交欣。頑懦增聳。伏惟知府安撫待制。儒術先覺。朝論咸推。辭綺心精。才高行峻。宜處巖廊之上。暫淹藩屏之維。束在淵衷。益當委重。蓋備嘗風俗之利病。得以爲條教之弛張。旄節舊臨。何止昔襦之惠。鄉枌所在。斯爲畫錦之榮。翕然大慰於風謠。何特鄙凡之受賜。籀僚屬之內。官秩最卑。崎嶇隨牒之行。艱苦喪家之狀。無伎自給。待祿紆貧。幸遇寬明。稍矜衰朽。庶殫夙夜。有補毫分。

謝帥司舉啓

伏念每懷靡及。寡過未能。特達飛章。貶屈裁鑒。荷瞻燭之明恕。忘蹤跡之誠微。廣度包荒。深仁扶弱。懷橄

愧汗僚友改觀。竊以時運艱難。才謨匱乏。惟用能可以致理。故體國莫如薦賢。邀劇孟而拜尹逢。事其可緩。尊樂毅而起王翦。勢固宜然。筦庫之卑。本何關於算略。判司之秩。但稍擢其久淹。既穫大田。亦兼斂其滯穗。別識勁草。不遂偃于疾風。拔十覲于五收。慮千豈無一得。顧甄藻之已誤。何事爲之可稱。此蓋伏遇某官誦邱索與祈招。多知往事。拾甲乙之科第。遍接名流。敘事之文。儷花鬪葉。方人之論。噓枯吹生。聲飛九牧之先。恩浹八州之內。倦符魚之條教。懷桑梓之菟裘。朝廷方倚其才。吏士顧依其德。豈乏鄒湛之輩。共登元禮之門。猥以空疎。驟玷清舉。籀歛歐憂國。流落餘生。潦倒何城。麤疎無取。力薄不足以承緒業。伎拙不能於謀稻粱。親承誨音。仰止芘賴。孤學寡予。世俗之所忽遺。舊聞不愆。寤寐之所詳味。年已至於不惑。道應得於少分。惟有進修。是其志趣。念裨益之效淺。徒銘刻之心牢。策蹇磨鉛。爲山學海。過此以往。未知所裁。

迎柳憲啓

右籀伏念一去門闌。十更歲律。遁逃空谷。渴見華夏之衣冠。顧覩除書。肅振霜臺之聲采。仰高有素。偃風載欣。竊以遠民屢擾而難安。諸偷乘間而竊發。馭以寬恕。則愈生姦猾之悖心。慘乎誅夷。則累及無辜之衆庶。臨道使指。奉將美意于遐方。果得耆英。壓塞清刑之重寄。豈弟之誠允篤。惻怛之實愈敦。伏惟提刑中大龍圖。窮經最明。覃思自得。負抱佐時之略。韜涵絕世之姿。校理祕文。卓犖諸儒之冠。剴煩將漕。幹旋五路之儲。逮朝廷宵旰之時。處祠館逍遙之適。玉堂鳳閣。方且登躋。金節繡衣。復還舊物。偉然素著之名。

績卓爾尊臨于吏民。朝論共推輿情咸悅。筆端甄品。屬城恪稟於六條。柱後惠文。羣寇豈勞于倂按。籀鯁生無似。驥尾叨榮。佩伏知憐。不忘造次。但深欽聳。曷究惻悰。官守所拘。台旆殊邈。

賀富樞密啓

伏審出綸揚命。近輔陞賢。樞政處中。機謨密勿。禮秩甚重。尊遇更光。竊以副宵旰之求。則無驚乎殊寵。妙裁成之業。乃得位而可欣。蓋論定于鄉校之游談。望隆于將士之節制。蒼生懸命。賴經理之遠圖。有識快心。懷先正之遺烈。赫赫愈著。新新不窮。致姦邪憚國之有人。使寇攘回慮。以革面。裴度進而朝廷重。召伯成而王心寧。伏惟樞密知院中大稽古制。今懷仁附義。以邁往之略。承天睭。以不倦之智。收人才。司耳目於臺端。言必有中。贊心膺於揆路。知無不爲。懋深實之謨。據醇積之學。應對鄰敵。折衝伐謀。備禦盛秋。據險知要。惟其卓犖之度。曾無官繁之經。咸具爾瞻。無出其右。支傾補綻。正九伐之綱維。端本整棼。慰萬方之饑渴。善類增氣。舊章舉行。庶幾山甫之賢。不忝烝民之雅。籀附于龍津驥尾。跂于鳳舉鴻軒。念多事之且平。獨空餐而自愧。同獎王室。或用九牛之一毛。走慶台階。尙須十駕於千里。敢辭藜藿之陋。將恐桑榆之枯。欽咏之私。敷染奚旣。

謝程殿撰啓

伏念欽承嘉惠。誤玷殊私。度廣包荒。恩多內恕。修辭審訥。愧汗忸怩。竊以選部典常。公庭殿最。詮綜既有成憲。考課無失大綱。雖奔軼凌厲之人。以爲拙宦而深賞。詳練之士。多出此塗。底績則其宣力也。勲保任。